



Komunikadu Imprensa
06 Outubru 2021
Parlamentu Nasionál

**JSMP lamenta ho alterasaun ba Lei Indultu no Komutasaun Pena:
Alterasaun loke dalan ba krime korrupsaun hetan indultu no komutasaun pena**

Parlamentu Nasional (PN) iha 05 Outubru 2021, liuhusi reuniaun plenária halo diskusaun no votasaun iha jeneralidade ba Projetu Lei Nu.33/V/3^a kona-ba Alterasaun dahuluk ba Lei Nú.5/2016 kona-ba Estabelese Prosedimentu Konsesaun Indultu no Komutasaun ba Pena.

Lei ne'e nu'udar prosedimentu própriu ida atu fasilita prosesu konsensaun indultu no komutasaun ba pena iha prátika ezersísiu kompeténsia Prezidente Repúblika nian kona-ba fó indultu no komutasaun pena tuir provizaun alinea i) Artigu 85 Konstituisaun.

“JSMP lamenta tebes ho inisiativa Parlamentu Nasionál nian hodi halo alterasaun ba Lei Indultu no Komutasaun Pena, tanba alterasaun ne'e loke dalan ba krime korrupsaun no krime boot sira seluk atu hetan indultu no komutasaun ba pena. Iha provizaun Artigu 4 Lei Indultu no Komutasaun Pena prevee hotu krime korrupsaun no krime sira seluk ne'ebé moldura penál tinan 8 ba leten la hetan indultu no komutasaun pena. Nune'e, JSMP hanoin lei ne'e di'ak ona no la nesesáriu atu altera artigu ida ne'e tanba bele eduka no prevene ema atu labele halo korrupsaun no komete krime boot sira. Bainhira halakon tiha provizaun sira ne'e, enkoraza ema atu halo korrupsaun, oho ema, halo violasaun seksuál, nsst. Tanba lei ne'e aseguara ona sira nia direitu atu hatun kastigu no hetan liberdade bainhira hatudu hahalok di'ak iha prizaun no kumpri ona pena 1/3”, dehan Diretora Ezekutiva JSMP, Ana Paula Marçal.

Durante plenáriu deputadu sira kestiona maka'as kona-ba razaun fundamentál husi proponente sira hodi halo alterasaun ba lei refere no mós razaun umanitária la klaru ne'ebé sei fó possibilidade atu hamosu interpretasaun ne'ebé ámbigu iha prátika fó indultu no komutasaun pena. Alende ne'e, tuir deputadu sira prosedimentu sira iha prosesu fó indultu ne'ebé regula iha Artigu 8 husi Projetu Lei Nu.33/V/3^a, ne'ebé tuir deputadu sira, iha possibilidade Prezidente Repúblika halo intervensaun ba serbisu tribunál sira nian.

Indultu ne'e mai husi prátika sira iha tempu antigu, bainhira Liurai sira perdua ema sira ne'ebé hetan pena morte tanba razaun umanitária¹. Iha tempu agora, razaun umanitária bazeia ba kestaun saúde hanesan ema sira ne'ebé sofre defisiénsia física ka moras ne'ebé kauza deficiente ka presiza tratamentu intensivu no kontinua, nsst, kestaun idade hanesan ema sira ne'ebé idade avansadu no idade sei ki'ik, kestaun familiár hanesan inan ne'ebé nia oan sira sei ki'ik no dependénsia ba nia. Ezemplu hanesan Brazil nian, Dekretu-Lei ne'e define kedas tipu deficiente física sira mak hanesan tetrapelegia no terapelegia no moras sira, idade avansadu ne'ebé bele hetan indultu mak 60 ba leten ne'ebé kumpri ona 1/3 husi nia pena no ida ki'ik ne'ebé hetan indultu mak tinan 21 mai kraik ne'ebé kumpri ona pena 1/3².

Nune'e, JSMP hanoin, se Parlamentu Nasionál atu altera lei ne'e, bele hadi'a de'it provizaun sira iha Artigu 3 kona-ba kritéria ba fó indultu hodi define ho spesífiku no detallu kona-ba kritériu sira. Tanba provizaun pontu 3) Artigu 3 nian prevee kritériu sira ne'ebé jerál liu. Provizaun ne'e la prevee ho spesífika kona-ba ezijénsia umanitária ne'e mak saida de'it, nune'e mós ezijénsia pesoál, familiár no sosiál ne'e saida de'it. Nune'e, bele fasil liu ba Governu bainhira prepara lista ba prizoneiru sira ne'ebé atu hetan indultu, nune'e mós ba Prezidente Repúblika bainhira atu fó indultu, no karik bele inklui hanesan kritériu ida mak kontribuisaun ba luta ba independénsia atu bele reflata mós ba ita-nia kontestu no realidade.

JSMP iha tempu naruk mak halo advokasia ba kestaun fó indultu no komutasaun pena ne'e. Iha 2010, bainhira Prezidente Repúblika ezerse nia podér konstitusionál hodi fó indultu no komutasaun pena, JSMP hakerek paraser ida hodi rekomenda ba Parlamentu Nasionál atu bele kria lei própria atu regula kona-ba fó indultu ne'e³. Bainhira iha 2016, bainhira Parlamentu Nasionál halo audénsia kona-ba ezbosu Lei Indultu no Komutasaun Pena, JSMP hatama nia paraser ida ho nia rekomendasaun sira atu Parlamentu Nasionál bele define ho di'ak kritéria sira atu fó indultu no krime sira ne'ebé labele fó indultu⁴.

Projetu altersaun ba lei ne'e deputadu sira apresenta ba plenaria Parlamentu Nasionál ho nia artigu mak hanesan Artigu 4 kona-ba krime sira insusetível (labele) ba indultu no komutasaun pena, Artigu 5 kona-ba fixasaun data anuál ba Prezidente Repúblika atu fó indultu, Artigu 8 kona-ba Paraser ne'ebé submete ho autus no Artigu 9 kona-ba Dekretu Prezidente no libertasaun kondenadu nian.

Projetu Lei ne'e aprova iha jeneralidade ho votu afavór 38, kontra 16 no absteinsaun 0 husi total deputadu presente na'in 54.

¹ Detallu informasaun bele haree iha artigu ida ne'e:

<https://repositorio.ufsc.br/xmlui/bitstream/handle/123456789/182151/Trabalho%20de%20Conclus%C3%A3o%20de%20Curso%20-%20Gabriela%20Consolaro%20Nabozny.pdf?sequence=1&isAllowed=y>

² Bele haree Dekretu-Lei ne'e iha ne'e: http://www.planalto.gov.br/ccivil_03/decreto/d3667.htm no <https://www.in.gov.br/web/dou/-/decreto-n-10.590-de-24-de-dezembro-de-2020-296387950>

³ Detallu husi paraser ne'e bele haree iha ne'e: https://jsmp.tl/wp-content/uploads/2013/03/Paraser-kona-ba-Lei-Indultu-Presidencial_TETUM.pdf

⁴ Detallu husi paraser ne'e bele haree iha ne'e: https://jsmp.tl/wp-content/uploads/2013/03/Paraser-kona-ba-Lei-Indultu-Presidencial_TETUM.pdf

Atu husu informasaun klaru tan kona-ba asuntu, favór bele kontaktu:

Ana Paula Marçal

Diretora Ezekutiva JSMP

Diresaun e-mail: ana@jsmp.tl

Website: <http://jsmp.tl>

www.jsmp.tl